

# Text da pressa

## **Cuors romontsch sursilvan intensiv 17 - 30 da fenadur 2011 a Laax**

Il Cuors romontsch sursilvan da 2011 vegn ad esser in arranschament per in e scadin che s'interessescha per il lungatg romontsch e sia cultura. Cun ses 10 levels da cumpetenzas, siu program accumpignont dalla sera, cun tut sias purschidas supplementaras e specialas representa el ina offerta multifara ed unica. Aunc mai ha il Cuors romontsch saviu offerir ina purschida talmein cumpletta ed arrundada sco ils onns 2010 ed 11. In bi tierm ei contonschius.

Cun siu „Ilg vêr sulaz da pievel giuvan“ ha Steffan Gabriel mess igl onn 1611 – pia exactamein avon 400 onns – in auter tierm: l'entschatta dil romontsch sursilvan scret. Dapli davart quei fatg ei d'udir – sper bia auter – a caschun dil program accumpignont dil Cuors romontsch 2011.

Pedagogas e pedagogs specialisai ella filologia instrueschan sils differents levels. Al nivel 8B instrueschan ulteriuramein docents hospitonts cun prelecziuns e seminaris sin scalem universitar. Il Cuors romontsch sursilvan ei era adattaus per Romontschas e Romontschs che vulan perfecziunar lur lungatg-mumma. Plinavon ei il CR era adattaus per scolaras e scolars che vulan sepreparar per examens d'admissiun a scolas cuntinuontas (scolas medias etc.).

Sper l'instrucziun durant il di organisein nus in program accumpignont che cumpeglia la cultura indigena. Il CR envida differentas referentas e differents referents indigens, mo era d'autrô. Excursiuns ora ellas regiuns fan part da nossa intermediaziun culturala.

Ulteriuras indicaziuns davart il cuors:

- tschun lecziuns a di instrucziun da lungatg
- ina ura cant romontsch per di
- 10 differents levels
- program accumpignont la sera
- Renconuschientscha
  - sco cuors da perfecziun per scolastas e scolasts entras il cantun Grischun
  - sco cuors da perfecziun per scolastas e scolasts gimnasials sin nivel naziunal (WBZ/CPS)
  - certificaziun internaziunala sco cuors da lungatg tenor il rom da referenza europè (RECOL)

Ils levels progredeschan tenor cumpetenza linguistica e senza interrupziun:

Ils levels da cumpetenza tenor il RECOL		Il levels dil CRFRR		
<b>scalem inferior A</b>	applicaziun dil lungatg elementara	<b>A1</b>	Vus saveis secommunicar a moda semplia, priu ch'il partenari tschontschi plaunsiu ed entelgeivel.	Level 1 CRFRR Level 2 CRFRR Level 3 CRFRR
		<b>A2</b>	Vus vegnis a frida en semplas situaziuns.	Level 3 CRFRR Level 4 CRFRR Level 5 CRFRR
<b>scalem miez B</b>	applicaziun dil lungatg autonoma	<b>B1</b>	Vus saveis secommunicar en situaziuns dil mintgadi.	Level 5 CRFRR Level 6 CRFRR Level 7 CRFRR
		<b>B2</b>	Vus saveis seconversar en bia situaziuns.	Level 7 CRFRR Level 8 CRFRR ≈ First Certificat in English (FCE)
<b>scalem superior C</b>	applicaziun dil lungatg cumpetenta	<b>C1</b>	Vus essas habels da secommunicar bunamein senza sbagls.	Level 8 CRFRR ≈ Certificat in Advanced in English (CAE)
		<b>C2</b>	Vus dumigneis bunamein aschi bein il lungatg sco in da lungatg-mumma.	Level 8 CRFRR ≈ Certificat of Proficiency in English (CPE)

La fiasta d'avertura ha liug dumengia, ils 17 da fenadur 2011 allas 15.30, el Hotel Laaxerhof a Laax-Murschetg. Il cuors da duas jamnas finescha cun la fiasta da ventschidas che ha liug venderdis, ils 29 da fenadur.

Il CR vegn presentaus detagliadamein sin nossa pagina d'internet [www.frr.ch](http://www.frr.ch). La broschura digitala sesanfla leu sco document da pdf. Bugen dein nus era ulteriur sclariment per telefon (081/943 22 08).

Inge Venzin, Conradin Klaiss, Francestg Friberg  
team d'organisaziun e direcziun

P.S. Dil reminent ei la pagina [www.frr.ch](http://www.frr.ch) vegnida distinguida cun la miur romontscha per la megliera pagina d'internet romontscha digl onn 2010.